



**Inatsisinut Ataatsimiititaliaq  
-/ MAANI**

Ulloq: 13-05-2015

J.nr.: 01.34.05-00002

**UPA2015/149 Naalakkersuinikkut sulinermut aningaasatigut tapiissuteqartarneq pillugu inatsisip allanngortinneqarnissaanik siunnersuut pillugu tusarniaanermi akissut.**

Inatsisinut Ataatsimiititaliap allakkatigut 10. april 2015-imeersutigut inatsisissatut siunnersuummut pineqartumut Suleriaatsimut Ataatsimiititaliaq oqaaseqaateqaqquaa, Suleriaatsimut Ataatsimiititaliamit akisassanik apeqqutinik erseqqinnerusunik arfinilinnik apeqquteqarluni.

**1. pill.: Suleriaatsimut Ataatsimiititaliaq isumaqarpa Inatsisartunut ilaasortaq attaviitsunngorpat tamatumalu kingorna partiimik nutaamik pilersitsippat qinikkamut tassungarpiaq ukiumi ataatsimi marloriarluni qinikkamut tapiissuteqartoqarsinnaasariaqartoq?:**

Siulittaasoqarfiup siunnersuutigaa inatsit erseqqissarneqassasoq, taamaalilluni erseqqinnerusumik takuneqarsinnaalerniassamat partii tunngaviusumik tapiissutisisinnaassappat (ullumikkorpiaq ukiumut 650.000 kr.-it) partii qinersisartunit Inatsisartunut qinerneqarsimasariaqartoq. Taamaalilluni naammangilaq partiip Inatsisartuni sinniisuutitaqalersimanissaa partiinit pioreersunit avissaarnerinnakkut.

Allatut oqaatigalugu: Inatsisitigut pissutsit allanngortinneqarnerat pineganngilaq, taamaallaalli inatsisip ukiorpassuarni atuutsinneqarnerani periaasiusimasumik erseqqissaanerulluni, inatsit atuisussnut innuttaasunullu erseqqinneroqqullugu.

Inatsisinut Ataatsimiititaliap siunnersuutigaa Suleriaatsimut Ataatsimiititaliap isumaliutigissagaa pissusissamisuussannginnersoq aalajangersagaq Siulittaasoqarfimmit siunnersuutigineqartumit suli erseqqinnerulersikkaanni. Inatsisinut Ataatsimiititaliap taamaalilluni paasisimavaa inatsisip massakkutut siunnersuutigineqartutullu oqaasertalerneqarneratigut, ilaasortaq partiiminit anippat attaviitsunngorlunilu ukiullu taassuma ingerlanerani partiimik nutaamik (ataatsimik ilaasortaataqartumik) pilersitsippat naapertuutinnngilluinnartumik pisoqarsinnaamat. Taamatut pisoqartillugu ilaasortaq/partii pineqartoq ukiup ataatsip iluani qinikkamut ataatsimut tassunga marloqiusamik tapiissutinik pissarsisinnaatitaasinnaavoq.

Suleriaatsimut Ataatsimiititaliap Inatsisinut Ataatsimiititaliaq isumaqatigaa nalinginnaasumik partiillu allat eqqarsaatigalugit pissusissamisuunngilluinnassamat piffissamut tassungarpiaq partiip sinniisaasa attaviitsutut tapiissutinik pissarsiffigereersimasaannut partii qinikkamut tapiissutinik aamma pissarsissappat. Pissusissamisuussaaq inatsisip maanna nutarterneqarnissaa iluatsillugu ajornartorsiutaalersinnaasoq tamanna pinaveersaartikkaanni.

Suleriaatsimut Ataatsimiititaliap piffissaq iluatsillugu Inatsisinut Ataatsimiititaliamut kaammattuutigissavaa isumaliutigeqqullugu inatsimmi § 5, imm. 2-3-mi aalajangersakkat allanngortinneqarsinnaannginnersuut, taamaalilluni tapiissutit siunissami ukiup affakkuutaartumik tunniunneqartartussanngortillugit 1. januar aamma 1. juli



ilaasortaataqassuseq aallaavigalugit. Ataatsimiititaliap taamaalilluni pissusissamisuunngitsutut isigaa partii ukiup affaani siullermi sinniisuutitaartuq tapiissutisisarmut ukiumut tamarmut atuuttunik. Pissutsit taamaapput inatsisip ullumikkut oqaasertai tunngavigalugit, tassa tapiissutit ukiumut ataasiarlutik tunniunneqartarlutik.

**2. pill.: Suleriaatsimut Ataatsimiititaliaq isumaqarpa asuli pinerussasoq pinngitsoorani atuuffinnik nalunaarsuisoqartartussanngussappat, tassunga nalunaaruteqartussaataaneq unioqqutinneqarpap pineqaatissiisoqarsinnaassanngippat?:**

Inatsisissatut siunnersuutip siullermeerneqarnerani Naalackersuisut akissuteqaamminni oqaatigaat pissusissamisuunngitsoq Inatsisissatut siunnersuummi § 4a-mi tassungalu immikkoortuni oqaatigineqarmat partiimut ilaasortaq ataaseq arlallilluunniit piaaralutik pinngitsoorani atuuffinnik nalunaarsuivimmu paasissutissiisimanngippata imaluunniit amigarluinnartunik paasissutissiisimappata partiimut aningaasatigut kinguneqartitsisoqarsinnaasoq partiimut qinikkanut tapiissutit ikilisinneqarnerisigut.

Naalackersuisut akerlianik isumaqarput taamatut pineqaatissiisarnermut aalajangersaasoqassappat tamanna Inatsisartunut ilaasortanut ataasiakkaanut pinngitsoorani atuuffinnik nalunaarsuinissamut aalajangersakkanik malinninngitsunut toqqaannartumik sammisinneqartariaqartoq, partiit eqqornagit.

Suleriaatsimut Ataatsimiititaliap aallaqqaasiutigalugu oqaatigisariaqarpaa tunngaviusumik eqqumiilluinnarmat Naalackersuisut akissuteqaamminni pissutissaqarsimmamata apeqqummut tassunga isummaminnik ersersitsinissaminnut, tamannami Inatsisartut namminneq suliassaannut ilaasutut isigineqartariaqarmat.

Ataatsimiititaliap tulliullugu oqaatigisariaqarpaa nalinginnaasumik Inatsisartut innuttaasunit isigineqarnerat innarlerneqarsinnaammat, Inatsisartut atuuffinnik pinngitsoorani nalunaarsuisussaataaneermik eqqussippata, piffissarlu ingerlareersoq takuneqarsinnaalerpat taanna annertuunik amigaateqarluniluunniit asuli paatsiveerussaataaginnartoq, ilaasortat arlallit nalunaarsuivimmu nalunaarsuinissamik soqutiginninnginnerat mattussineralluunniit tunngavigalugit.

Pinngitsoorani atuuffinnik nalunaarsuinissap ataqqineqarnissaata qularnaarneqarnissaa eqqarsaatigalugu Inatsisartut kinguneqartitsisinnanissaat mattunneqassagaluarpap, taamaalillunilu pissusissamisoornepaassaaq nammineq piumassutsimik atuuffinnik nalunaarsuisinnaaneq ingerlatiinnarneqarpap. Kisiannili pinngitsoorani atuuffinnik nalunaarsuisarnissamik isuma Inatsisartunut ilaasortanit innuttaasunillu nalinginnaasumik tapersorsorneqarmat arlaatigut kinguneqartitsisarnermut aalajangersakkamik qularnaarisoqartariaqarpoq.

**3. pill.: Suleriaatsimut Ataatsimiititaliaq isumaqarpa pinngitsoorani atuuffinnik nalunaarsuivik eqqarsaatigalugu ilaasortanut pisussaaffimminnik malinninngitsunut pinerluttulerinermut inatsit naapertorlugu pineqaatissiisoqarsinnaasariaqartoq?:**

Inatsisissatut siunnersuummut nalinginnaasunik nassuiaatini atuarneqarsinnaavoq Siulittaasoqarfiup nalilersimagaa atuuffinnik pinngitsoorani nalunaarsuisussaataaneermut malittarisassanik malinninnginneq ilaasortanut ataasiakkaanut pilerluttulerinermi inatsit tunngavigalugu kinguneqartinneqartariaqanngitsoq, tassami taamatut pinerluttulerinermi inatsit tunngavigalugit eqqartuunneqarnermik kinguneqartitsinerit qinigaasinnaanerup



annaaneqarneranik kinguneqarsinnaammata, taamaattoqassappallu unioqqutitsineq pineqaatissiissullu imminnut naapertuutissanatik. Tamatumunnga ilanngunneqarsinnaavoq pinerluttulerinermik inatsit malillugu kinguneqartitsisoqassagaluarpat suliassap suliarineqarnera sivisoorujussuarmik ingerlasinnaassammat, taamaalliluni imaaleriaannaalluni qinikkatut sulinermi pisussaaffinnik sumiginnaaneq pillugu pinerluttulerinermi inatsimmi aalajangersakkat naapertorlugit eqqartuunneqarneq aatsaat naatsorsuutigineqarsinnaalluni ukiut arlallit qaangiunneranni – immaqalu aatsaat nutaamik inatsisartunut qinersisoqareernerata kingorna – tamannalu naapertuutinnigisoq ingerlaannaq takuneqarsinnaavoq.

Suleriaatsimut Ataatsimiititaliap taamaattumik siulittaasoqarfik isumaqatigaa pinerluttulerinermik inatsit atussallugu sakkussaannngimmat eqqortoq pinngitsoorani atuuffinnik nalunaarsuiffik pillugu malittarisassanik ilaasortat malinninnginnerat eqqarsaatigalugu.

Ataatsimiititaliap taamaattumik tikkuassavaa, aalajangiusimaneqassappat pinngitsoorani atuuffinnik nalunaarsuisoqartalissasoq peqatigitillugulu inatsisissatut siunnersuummi § 4a-mi partiinut kinguneqartitsisarnissamut aalajangersagassatut siunnersuut inatsisissatut siunnersuummit peerneqarluni, pinngitsoorani atuuffinnik nalunaarsuinissaq eqqarsaatigalugu ilaasortanut pisussaaffimminnik naammassinnissimannigitsunut kinguneqartitsisoqartarsinnaammata Inatsisartut Suleriaasianni § 49, imm. 5-imi<sup>1</sup> aalajangersagaq naapertorlugu. Aalajangersagaq ima oqaasertaqarpoq:

*”Inatsisartut pissuserissaarnissaq pillugu maleruagassaannik ilaasortaq annertuumik sanioqqutitsippat, ullut ataatsimiiffiusut 14-it tikillugit ilaasortaq Inatsisartut ataatsimiinnerinit Inatsisartut Siulittaasoqarfiata peqataasussaaajunnaarsinnaavaa. Peqataasussaaajunnaarsinneqarnermi nalaani ilaasortaq Inatsisartut ataatsimiititaliaasa ataatsimiinnerini aammattaaq peqataasinnaanngilaq. Ilaasortaq peqataasussaaajunnaarsitaasoq piffissami peqataasussaaajunnaarnermini aningaasarsiaqassanngilaq.”*

Pinngitsoorani atuuffinnik nalunaarsuisarnissaq eqqarsaatigalugu ilaasortanut pisussaaffimminnik naammassinninngitsunut § 49, imm. 5-imi aalajangersagaq atorneqassappat Naalakkersuisut ernummatissaarutissapput, taamaaliornikkut pineqaatissiissut pineqaatissinneqartullu akornanni toqqaannartumik atassusiisoqassammat.

Taamaattorli § 49, imm. 5-imi aalajangersagaq maannamut suli atorneqarsimannigilaq, qanorluunniillu pisoqaraluarput aalajangersakkap atorneqarnissaa Inatsisartut Naalakkersuisullu pillugit Inatsisartut inatsisaat naapertorlugu ilaasortat pisinnaatitaaffii eqqarsaatigalugit iliuutsit sakkortoosussuut isumaqarnarsinnaalluni. Pineqartumut atatillugu aalajangersagaq atorneqassappat tamanna aamma ulluinnarni suliniarnermi ajornartorsiutinik pilersitsisussaaavoq, minerunngitsumik aallaqqaataani suleriaasissioqartariaqassammat Siulittaasoqarfimmut assut ajornartuusussamik. Taamatutaaq aalajangersakkap pineqartup atorneqarnera ilaasortanit minnerunngitsumillu innuttaasunit iliuutsit sakkortuallaatat nalinginnarsiornertullu misigineqarsinnaassalluni.

Tamanna tunngavigalugu Suleriaatsimut Ataatsimiititaliaq isumaqarpoq pinngitsoorani atuuffinnik nalunaarsuivik pillugu malittarisassanik ilaasortat malinninngissinnaanerata

---

<sup>1</sup> Inatsisissatut siunnersuummut nalinginnaasumik nassuiaatini immikkoortoq 2.2.-mi immikkoortumi kingullermi oqaatigineqartut apeqqaatinnagit.



eqqarsaatigalugu, qularnaarneqartariaqartoq erseqqinnerusumik immikkullu kinguneqartitsisarnermut aalajangersagaqarnissaa, isumaqarnarmat pinerluttulerinermut inatsimmi Inatsisartullu suleriaasianni § 49, imm. 5-imi nalinginnaasumik pineqaatissiisarnermut aalajangersakkat ulluinnarni atorneqarsinnaangitsut.

**4. pill.: Suleriaatsimut Ataatsimiititaliaq isumaqarpa, pissusissamisoorsinnaanginnersoq pinngitsoorani atuuffinnik nalunaarsuivimmu paasissutissiinissamut pisussaaffik Inatsisartuni partiinut sammisinnearpat ilaasortanut ataasiakkaanut sammisinnearani?:**

Immikkoortumi 2-mi oqaatigineqartutut Inatsisissatut siunnersuutip siullermeerneqarnerani Naalakkersuisut nalilerpaat pissusissamisuunngitsoq Inatsisissatut siunnersuummi § 4a-mi tassungalu immikkoortuni oqaatigineqarmat partiimut ilaasorta qataaseq arlalilluunniit piaaralutik pinngitsoorani atuuffinnik nalunaarsuivimmu paasissutissiisimangippata imaluunniit amigarluinnartunik paasissutissiisimappata partiimut aningaasatigut kinguneqartitsisoqarsinnaasoq partiimut qinikkanut tapiissutit ikilisinneqarnerisigut.

Naalakkersuisut akerlianik isumaqarput taamatut pineqaatissiisarnermut aalajangersaasoqassappat tamanna Inatsisartunut ilaasortanut ataasiakkaanut pinngitsoorani atuuffinnik nalunaarsuinissamut aalajangersakkanik malinninngitsunut toqqaannartumik sammisinnearqartariaqartoq, partiit eqqornagit.

Inatsisinut Ataatsimiititaliap isumaliutigisimavaa Naalakkersuisut eqqarsarnartoqartitsinerat – naak tamanna tunngaviusumik naapertuutinningsutut isigineqarsinnaagaluartoq - naaperiarneqarsinnaanginnersoq *partiit* pinngitsoorani atuuffinnik nalunaarsuivimmu paasissutissiisussaataalernerisigut, taamalu taamatut pisussaaffik ilaasortani ataasiakkaaniitinnagu.

Taamaaliornikkut partiit atuuffinnik nalunaarsuivimmu piffissaq eqqorlugu paasissutissanik tunniussinikkut qinikkanut tapiissutit ikilisinneqannginnissaat qularnaarsinnaassavaat. Taamaalilluni pisussaffiup malinneqarnissaa equutsinneqassanngikkaluarpat pisussaaffeqartut pineqaatissinneqartullu assigiissagaluarp.

Taamaalilluni partiit namminneq qularnaarniagassarissavaat qinigassanngortitamik atsiukkamik nalunaaruteqareernissaat partiimut qinigassanngortissagunik paasissutissat pisariaqartut naunaarsuivimmu tunniutissallugit. Taamaattoqassappalli pisariaqassagunarpoq pinngitsoorani atuuffinnik nalunaarsuisarnissaq pillugu malittarisassap aatsaat Inatsisartunut tullianik qinersinissamut atatillugu atuutilersissallugu, tamannalu naalakkersuinikkut kissaatiginangitsutut oqaatigineqarsinnaalluni.

Taamaalilluni Suleriaatsimut Ataatsimiititaliaq isumaqanngilaq Inatsisisut Ataatsimiititaliap eqqaasaatut periaaseqarsinnaaneq kaammattuutigineqarsinnaasutut isikkoqartoq. Taamaalilluni ataatsimiititaliaq isumaqarpoq Siulittaasoqarfiup aallaqqaammut periaasissatut siunnersuutigisaa kaammattuutiginarnerpaajusoq.

**5. pill.: Suleriaatsimut Ataatsimiititaliaq isumaqarpa pinngitsoorani atuuffinnik nalunaarsuinissaq pillugu aalajangersakkat malinneqanngippata Inatsisartut Suleriaasianni § 49, imm. 5-imi aalajangersagaq atorneqarsinnaasoq?:**

Apeqqummut 3-mut akissuteqaatip immikkoortua kingulleq inussiarnersumik innersuussutigineqarpoq.



## **6. pill.: Partiit Inatsisartuni atortussanik nutseriikkanik tunniussisarnissamut pisussaaffeqarunnaassappata partiinut tapiissutit qanoq annertutigisumik ilanngaavigineqartariaqassappat?**

Inatsisinut Ataatsimiititaliap maluginiarsimavaa partiit ilaata inatsisissatut siunnersuutip siullermeerneqarnerani oqaatigimmagu siunnersuutit apeqqutillu oqaatsit ataasinnaat atorlugit Inatsisartunut tunniunneqarsinnaasariaqartut, atortussat partiimit namminermit danskisuumut kalaallisuumulluunniit nutsertingikkaluarlugit.

Inatsisinut Ataatsimiititaliap oqaatigaa tamanna inatsisissatut siunnersuummut matumunnga toqqaannartumik attuumassuteqanngitsoq. Inatsisinut Ataatsimiititaliap tamanna oqaatigeerlugu oqaatigaa:

*”Partiit nutserisussaajunnaarsitaassappata, ..... Taava partiinut tapiissutit suliassap taassuma isumagineqarnissaanut ullumikkut tunniunneqartartut ilanngaavigineqartariaqassapput.”.*

Partiit Inatsisartut inatsisaat matumani pineqartoq aqputigalugu siunertamut tapiissutigisarmata Inatsisinut Ataatsimiititaliap paaserusuppaa partiit nutserinissamut pisussaaffeerutissagaluarpata partiinut tapiissutit qanoq annertutigisumik ikilisinneqartariaqassanersut.

Suleriaatsimut Ataatsimiititaliap tamatumunnga atatillugu aallaqqaasiutigalugu oqaatigissavaa Inatsisartuni atugassanik partiit nutserisitsisarnerinut tapiissutit naalakkersuinnermut sulinermik nalinginnaasumik partiinut tapiissutit ilaattut tunniunneqartarmata aningaasanut inatsimmi konto pingaarneq 01.06.11 Naalakkersuinnikkut sulineq aqputigalugu. 2015-imut Aningaasanut inatsimmi siunertamut tamatumunnga 9,76 mio. kr.-inik, ukiunilu tulliuttuni taakku amerlaqataannik, immikkoortitsisoqarnissaa siunnersuutigineqarsimavoq.

Tapiissutit taakku partiinut qinigaatitaqarsimasunut tamanut tunngaviummik tapiissutinut ukiumut 650.000 kr.-inik aningaasartalinnut Inatsisartunulu qinigaatitamut ataasimut ukiumut 170.000 kr.-inik aningaasartalimmut avinneqarsimapput.

Tapiissutit ataatsimoortumik tapiissutitut tunniunneqartarput, partiit tamarmik atugassaminnik ataatsimut tunineqartarlutik, tamatuma kingorna partiit namminneq kissaatitik pisariaqartitatillugu maliillugit agguataarsinnaasaannik. Ukiut ingerlanerini inatsisip allanngortinneqartarneranut atatillugu piumasaqaatinik assigiinngitsunik tapiissutinik tunineqassagunik partiit naammassisimasariaqaannik, ilanngussisoqartarsimavoq, piumasaqaatit assigiinngitsut taakku erseqqinnerusumik aningaasartalerneqarsimanngikkaluartut.

Tamatumunnga atatillugu immikkut maluginiagassaavoq Naalakkersuinnikkut sulinermut aningaasatigut tapiissuteqartarneq pillugu Inatsisartut inatsisaata allanngortinneqarneranik Inatsisartut inatsisaannik nr. 16-imik, 3. december 2009-meersumik Inatsisartut akuersissuteqarnerat, taannalu tunngavigalugu Inatsisartunut aningaasaliissutinik 3,145 mio. kr.-it naalakkersuinnikkut suliniaqatigiiffinnut tapiissutinut nuunneqarnerat.

Taamanikkut inatsisissatut siunnersuutaasup siunertarisimavaa inatsisisinik tunngaveqanngitsumik toqqaannanngitsumik partiinut tapiissuteqartarnerup, Inatsisartut



allattoqarfiat aqutugalugu taamanikkut ingerlanneqartup, peerneqarnissaa, taamatut partiinut tapiissuteqartarneq nalornginarsimammat naalackersuinikkut sulinermut tapiissuteqartarneq pillugu inatsimmut naapertuunnersoq, taamatullu taamatut inatsisitigut tunngavissaqanngitsumik toqqaannanngitsumik tapiissuteqartarneq akerliummat pisortanit tapiissuteqartarnerup ammasuunissaanut, tamannami piumasaqaataammat innuttaasut oqartussaaqataanerat eqqarsaatigalugu tapiissutaasartut inatsisitigut illersorneqarsinnaanerannut.

Tamanna iluatsillugu inatsimmut erseqqissumik ilanngunneqarpoq, tamatuma kingorna naalackersuinikkut suliniaqatigiiffinnut ingerlatanulluunniit toqqaannartunik toqqaanngitsunilluunniit nutaanik tapiissuteqartoqarsinnaanngitsaq, tamanna inatsimmi erseqqilluinnartumik tunngavissinneqarsimatinnagu.

Taamaalilluni nutsigassanik isumaginnittarneq partiiniit Inatsisartunut uterteqqinneqassappat naalackersuinikkut suliaqarnermut aningaasatigut tapiissuteqartarneq pillugu inatsit nalinginnaasumik allanngortittariaqassaaq.

Tamatuma saniatigut inatsimmi suliassat aalajangersimasut arlallit partiinut tapiissutit qaffanneqarnerannut taarsiullugu partiinut nuunneqartussat ataasiakkaarlugit taagorneqarput. Suliassat taakku ilaagaat nutserisitsisarneq.

Nutserisitsinernut aningaasartuutit eqqarsaatigalugit taamanikkut inatsisissatut siunnersuutaasumut nalinginnaasumik nassuiaatini suliassap Inatsisartunit partiinut nuunneqarnisaannik kissaateqarnermut tunngaviusutut makku oqaatigineqarput:

*”Assersuutigalugu aalajangiiffigisassatut siunnersuutit aammalu oqaaseqartartut oqaaseqaatissaasa nutserneqarnerannut partiit aningaasartuutaat Inatsisartut allaffeqarfiannit akilerneqartarput. Akileeqqusissutit fakturat nassiunneqartut eqqortuunersut imaluunniit akissarsiasatut akileeqqusissutit sullississutigineqartunut naapertuunnersut Inatsisartut naatsorsuuseriviata nalilissallugit periarfissaqarfinginngilaa. Tamanna partiimit pineqartumit taamaallaat misissorneqarsinnaavoq, aningaasartuulli partiimit nammineq akilerneqartussaannngilaq, taamaattumillu taamatut misissuinissaminut immikkut tunngavissaqartutut kajumissuseqartutulluunniit partii misigisimassanani. Taamatutaaq akinik qaffasinnerusunik (nukinginnartunik suliaqarnermi akigitinneqartartunik) akiliuteqartoqaqqunagu atortussanik nutserneqartussanik siusissukkut nassiussinissamut taama aaqqissuussisimanikkut partiit kajumissuseqalersinneqarneq ajorput.”*

(Nalinginnaasumik nassuiaatit imm. 1.b)

Nalinginnaasumik ajornartorsiutit taakku saqqummeqqissapput nutserinermi suliassat taakku partiiniit Inatsisartunut tamakkiisumik ilaannakortumilluunniit uterteqqinneqassagaluarpata. Peqatigitillugu naatsorsuutigineqartariaqarpoq nutsigassanik isumaginnittarneq ullumikkumut sanilliullugu akisunerussasoq, kajumissuseqarnissamut atatillugu ajornartorsiutit taaneqartut naapertorlugit. Oqartoqartarneratuut pisussaaffiit akisussaaffiillu akornanni ataqatigiittoqarunnaassaaq.



Taamanikkut inatsisissatut siunnersuutaasumi immikkut oqaatigineqarpoq:

*"Inatsisissatut siunnersuutip nassatarisaanik assersuutigalugu oqaaseqartartut oqaaseqaataannik ilaasortallu siunnersuutaannik nutserisitsineq siunissami partiit namminneq akilertalissavaat. Tamatumani taakku Inatsisartut atugassaattut piffissaq eqqorlugu nutserneqarnissaannut partiit pisussaaffeqarnerat allanngunngilaq.*

*Ataatsimiititaliat isumaliutissiissutaannik aammalu partiit ikinnerussuteqarlutik oqaaseqaatigiunnagaannik nutserineq Inatsisartut allaffeqarfiannit suli isumagineqartassaaq. Ikinnerussuteqarlunili oqaaseqaatip partiip nammineq nutserisuannit nutserneqassasoq partiimit kissaatigineqarpat, tassunga aningaasartuut partiimit nammineq akilerneqassaaq."*  
(§ 1-imut nassuiaatit)

Tamatuma saniatigut oqaatigineqartariaqarpoq imaanngimmat suliassaq ilumut partiiniit Inatsisartut Allattoqarfiannut nuunneqarsinnaasoq, tamannaluunniit inatsisip allanngortinneqarneratigut periarfissaqaleraluarpat.

Taamaalilluni ilisimananngilaq Inatsisartut Allattoqarfiata nutserisoqarfiata imaaliaallaanaq suliassaq tamanna tigusinnaassagaa atorfiit amerlineqanngippata peqatigitillugu allaffissanik ullumikkut pigineqanngitsunik pissarsisoqanngippat.

Tamatuma saniatigut tunngavissanut ilaasariaqarpoq naatsorsuutigisariaqarmat nutserisoqarfiup suliassaminik tamatuminnga tigusinissamat suliannut atatillugu annertuunik nangaassuteqarnissaat.

Taamaalilluni apeqqutaalerpoq Inatsisartuni atugassanik nutserisitsinernut partiit qanoq amerlatigisunik aningaasartuuteqartarnersut. Tamanna pisortatigoortumik naatsorsuusiorneqarsimanngilaq, partiillu naatsorsuutaat tamanut saqqummiunneqarsimasut periarfissiipput tamatuma paasisaqarfigilaarnissaanut.

Nutserinernut aningaasartuutinut ataani takussutissiami kisitsisit partiit naatsorsuutaanniit tamanut saqqummiunneqarsimasuneerput, oqaatigineqassallunilu 2014-imut naatsorsuutit suli saqqummiunneqanngimmata:

	2013	2012	2011	2010
<b>Atassut (1)</b>	94.000	124.000	185.000	143.000
<b>Demokraatit</b>	108.000	209.000	149.000	111.000
<b>I.A. (2)</b>	315.000	193.000	179.000	185.000
<b>Siumut</b>	215.000	292.000	144.000	109.000
<b>Partii Inuit (3)</b>	40.000			
<b>Kattusseqatigiit (4)</b>			77.000	61.000
Katillugit	<b>774.013</b>	<b>820.012</b>	<b>734.000</b>	<b>609.000</b>

Nassuiaatit:

Nalorninarpoq tamatumani taamaallaat oqalutseqartarnermut aningaasartuutit

- 1 pineqarnerisut imaluunniit nutserisitsisarnert ilaatinneqarnerisut.  
Aningaasartuutit Inatsisartunut ilaasortaattat nutserunneqartarnerannuinaq
- 2 tunngapput



- 3 2013-imut naatsorsuutit qaammatinut aqqanilinnut kingullernut tunngapput, 2013-ip aallartilaarnera partii aatsaat pilersinneqarmat. Partiip taamanikkut toqqarpaa atortussaaminik ilaat nutsertittarniarnagit, soorlu partii sinnerlugu inatsisartuni oqaaseqaatissat.
- 4 Partiip naatsorsuutai kingulliit 2012-imeersuupput. Ukioq taanna nutserinermut/oqalutseqarnermut aningaasartuutit immikkoortinneqarsimangillat.

Naatsorsuutitigut takuneqarsinnaanngilaq aningaasartuutit qulaani taaneqartut tamakkiisumik Inatsisartuni sulinermit tunngatinneqarsinnaanersut. Naatsorsuutigineqarporli aningaasartuutit pineqartut annertunersaat Inatsisartunut sulinermit tunngasuusut, tassami ass. qineqqusaarnermit aningaasartuutit naatsorsuutini immikkut naatsorsuusioreneqartarmata.

Tamatuma saniatigut isumaliutigineqarsinnaavoq qulaani kisitsisini Inatsisartuni sulineq eqqarsaatigalugu partiit nutserisitsisarnerat nutserisarnerallu tamarmiusoq pineqarnersoq. Taamaalilluni ilimanarluinnarpoq partiit allaffeqarfii namminneq aamma nutsigassanik isumaginnittassasut immikkut aningaasarsiaataanngitsunik. Tamatuma saniatigut aamma imaalluarsinnaavoq ilaasortat ataasiakkaat immikkut aningaasarsissutigingikkaluarlugu partii sinnerlugu nutserisassasut. Suliata tamakku immikkut naatsorsuusioreneqarsimangitsut nutserinermik suliassat Inatsisartunut utertinneqarpata Allattoqarfiup nutserisuinit isumagineqartalissapput, isiginarneqartariaqartumik aningaasaliissutit Inatsisartunut utertinneqassagaluarpat. Tamatuma saniatigut aamma isiginiarneqartariaqarpoq suliassaq tamanna Inatsisartunut utertinneqassagaluarpat suliassamik Inatsisartunut utertitsinikkut suliassamik naammassinniarnaq nakkutilliinissamut kajumissuseqannginnerup ajornartorsiutaaneranik sunnersimanegassamat, soorlu tamanna pissutaasimasoq taamanikkut suliassap partiinut tunniunneqarneranut. Pissutsit tamakku eqqarsaatigalugit qulaani naatsorsukkat missingerlugu 15 pct.-inik ilaneqassapput.

Taamaalilluni ataatsimut missingerneqarsinnaavoq partiinut tapiissutit tamarmiusut ukiumut 850.000 kr. ataakkunarnagit ikilisinneqartariaqalissasut, nutsigassanik isumaginnittarneq partiinut Inatsisartunut utertinneqassagaluarpat. Tamanna akunnaallisillugu nutserisut marluk akissarsiaannut tamarmiusunut naapertuuppoq, tutsuiginarsorinarlunilu. Suleriaatsimut Ataatsimiititaliap erseqqissassavaa ataatsimiititaliap taama missingiinermigut isummerfiginngimmagu partiinut tapiissutit taamatut ikisilinneqarnissaat kissaatiginarnersoq. Taamatut missingiineq suliami naalakkersuinikkut isumaliutinut ingerlasunut tapiliussamisut ataatsimiititaliap taamaallaat isigivaa.

Ataatsimiititaliap tamatumunnga ilanngutissavaa nutserisitsisarneq Allattoqarfimmu uterteqqinneqassasoq aalajangerneqassagaluarpat, tamanna partiini allattoqarfimmilu sukumiisumik allaffeqarfikkoortumik piareersarluarneqaaqqaartariaqarmat. Piareersaalluni sulinermit tamatumani suliassaq sumikuunerusumik aallaaserineqartariaqassaaq aningaasartalerneqarlunilu.

Ikinngutinnersumik inuulluaqqusillunga

Lars-Emil Johansen  
Suleriaatsimut ataatsimiititaliap siulittaasua